

մտածումներն ու խորհրդածությունները կիսեց այս շրջանի իր գավակների հետ՝ բացատրելով Մեծ Պահքի շրջանի էությունն ու իմաստը և այդ գեղեցիկ ավանդություններին ամուր փարվելու անհրաժեշտությունը, շեշտելով արժեքները գնահատելու գիտակցության կարևորությունը. «Մարդն է, որ արժեք է տալիս և՛ նյութին, և՛ գործիքին: Այս է, որ Մեծ Պահքի այս քառասունյա շրջանին մեր եկեղեցական արարողությունների, ընթերցումների միջից մենք պիտի ձգտենք, որ մեր ժողովուրդն առավել ևս զորանա դեպի ներքին բարեփոխություն և բարեկարգում հառաջանալու ընթացքի մեջ», — եզրափակեց Վեհափառ Հայրապետը:

Նույն օրը, ուշ երեկոյան, Նորին Սրբությունը վերադարձավ Մայր Աթոռ Ս. Էջմիածին:

ՎԵՀԱՓԱՌ ՀԱՅՐԱՊԵՏԻ ՀԱՅՐԱԿԱՆ ԱՅՅԸ ԳՅՈՒՄՐԻԻ ՅՈԹՎԵՐՔ Ս. ԱՍՏՎԱԾԱԾԻՆ ԵԿԵՂԵՑԻ

Սույն թվականի մարտի 12-ին Գարեգին Վեհափառը, ուղեկցությամբ Տաթև արք. Սարգիսյանի, Ասպետ վրդ. Պալյանի, Արտակ արք. Տիգրանյանի, Բագրատ արք. Գալստյանի, Կարապետ արք. Հարությունյանի և Աշոտ արք. Մնացականյանի, այցելեց Շիրակի թեմ՝ Գյումրիի Յոթվերք Ս. Աստվածածին եկեղեցի՝ Մեծի Պահոց քառասունյա պահեցողության և ապաշխարության շրջանի կարևորությունը բացատրելու, ժողովրդին զորացնելու և լիցքավորելու նախաձեռնություններով: Սա Վեհափառ Հայրապետի՝ Մեծի Պահոց շրջանում երրորդ այցելությունն էր իր հավատացյալ ժողովրդին, Երևանի Ս. Սարգիս և Աշտարակի Ս. Մարինե եկեղեցիներն այցելելուց հետո:

Գյումրի քաղաքի մուտքին Նորին Սրբությանը դիմավորեցին Շիրակի թեմի հոգևոր դասը, թեմական խորհրդի ատենապետ արն. Մարտին Թադևոսյանը, մարզպետարանի ներկայացուցիչ արն. Ավետիք Հարությունյանը, մարզի պետական, պաշտոնական ներկայացուցիչները:

Գյումրիում Վեհափառ Հայրապետը, Գյումրիի ամբողջ հոգևոր դասի, դպրեվանքի ուսանողության և ժողովրդի հոծ բազմության ուղեկցությամբ, մուտք գործեց Յոթվերք Ս. Աստվածածին եկեղեցի, որտեղ պաշտված խաղաղական ժամերգությունից հետո, Նորին Սրբությունը իր հայրական խոսքն ուղղեց ժողովրդին՝ ասելով. «Մեծ Պահքը մեր հոգևոր գարունն է: Եվ այս օրերը մեր ներաշխարհը մաքրելու, բյուրեղացնելու, զորացնելու և զարնանացնելու օրեր են: Հետևաբար, մենք ուրիշներին չնայենք, այլ հայացքներս բևեռենք մեր ներքին մարդու վրա: Ուրիշներին նայելով մենք մեզ ավելի մեծ վնաս ենք հասցնում: Թողնե՛նք: Ապրենք մտքով, խոսքով և գործով բարին արարելու նախաձեռնություններով, որպեսզի Հարության օրերին չմնանք մեռյալներ, այլ արժանանանք այդ Ս. Հարությանը»:

Այնուհետև իր ժողովրդի հետ անմիջական խոսակցություններ ունենալով և ծանոթանալով նրանց կարիքներին ու ապրումներին, Վեհափառ Հայրապետը երեկոյան վերադարձավ Մայր Աթոռ Սուրբ Էջմիածին:

ԳԱՐԵԳԻՆ Ա ԿԱԹՈՂԻԿՈՍԻ ԱՅՅԸ ԿՈՏԱՅՔԻ ՄԱՐԶ

Մարտի 17-ին Նորին Սրբություն Գարեգին Ա Ամենայն Հայոց Կաթողիկոսը մեկնեց Կոտայքի թեմ: Սույն ուղևորությունը, Մեծի Պահոց շրջանի քարոզների շրջանակներում, Նորին Սրբության հերթական այցելությունն էր:

Մարզի սահմանագլխին Վեհափառ Հայրապետին աղ ու հացով դիմավորեցին

Կոտայքի մարզպետ Հովհաննես Հովհաննիսյանը, թեմակալ առաջնորդ Առաքել վրդ. Քարամյանը, մարզի պատասխանատու աշխատակիցներ և ուղեկցեցին դեպի Հրազդանի Ս. Աստվածածին եկեղեցի:

Եկեղեցում հատուկ արարողակարգից հետո Վեհափառ Հայրապետին ողջույնի ջերմ խոսքեր ուղղեց թեմակալ առաջնորդ Առաքել վրդ. Քարամյանը: Ապա ներկաներին իր պատգամը տվեց Նորին Սրբությունը: Այս այցելությունը, ինչպես նկատեց Նորին Սրբությունը, մի գեղեցիկ առիթ է ընձեռում առավել սերտացնելու, առավել ամրացնելու կապը Մայր Աթոռի և Կոտայքի թեմի միջև «և այսօր ես բերել եմ հոգեկան վերափթթումի, վերազտումի և վերաբյուրեղացման կոչը և այս այցելությամբ մի ոսկե կամուրջ կապելու Ս. Էջմիածնի և ձեր միջև»:

Հոգեկան վերանորոգությանը, հոգու լույսին էր նվիրված Վեհափառ Հայրապետի խոսքը, լույս, որ կյանքի ճշմարտությունն ըմբռնելու բանալին է, և իր պատգամն ամփոփեց Եղիշեի «Լաւ է կոյր աչօք, քան կոյր մտօք» խորհմաստ արտահայտությամբ:

Հրազդանի Ս. Աստվածածին եկեղեցուց մեքենաների շարասյունը ուղևորվեց դեպի մարզպետարան, որի հարևանությամբ կառուցվում է առաջնորդարանի շենքը: Նորին Սրբությունը հանգամանորեն ծանոթացավ շինարարության ընթացքին և արեց իր դիտողությունները:

Վեհափառ Հայրապետի հաջորդ կայանատեղին Բջնու Ս. Աստվածածին եկեղեցին էր, 9-րդ դարի հույակերտ մի կառույց, որ իր գոյության 1000-ամյա պատմության ընթացքում արժանացել էր ևս մեկ կաթողիկոսական այցելության՝ 1906 թվականին օրհնաբեր այցելությամբ եկեղեցի էր ոտք դրել Խրիմյան Հայրիկ Կաթողիկոսը:

Բջնի մեկնելու ճանապարհին Վեհափառ Հայրապետը ծաղկեպսակ դրեց Չարենցավանի մուտքին գտնվող «Վերածնունդ» հուշարձան-կոթողին, որը վեր է խոյացել մեծանուն բանաստեղծ Եղիշե Չարենցի անմահ հիշատակին: Այստեղ էին Չարենցավանի քաղաքապետը, մեծահասակներ, դպրոցականներ, որոնք իրենց ասմունքով մեծ հաճույք պատճառեցին Վեհափառ Հայրապետին:

Բջնու եկեղեցում, դիմելով հավաքված խանդավառ ժողովրդին, Նորին Սրբությունը պատգամեց քրիստոնյային վայել կեցվածքով ու գործերով նախապատրաստվել Ս. Հարության տոնին, մաքրվել հոգով, լցվել մեղքը հաղթելու կարողությամբ:

Հայրապետական պատգամից հետո եկեղեցու բակում, գյուղի դպրոցականների մասնակցությամբ, տեղի ունեցավ մի փոքրիկ համերգ: Մանուկները իրենց երգ ու պարով Վեհափառ Հայրապետին ճանապարհեցին դեպի Մայր Աթոռ Ս. Էջմիածին: